



序

古昔聖王設爲五品之教振民於飽

三

代循是以建學而鍾鼓管絃以爲之器典謨雅
頌以爲之文揖讓酬酢以爲之容詠歌講誦以
爲之業其所以禁防而開發之者爲事甚詳而
爲物甚備也迨夫黨庠術序之漸衰後世自國
學郡縣學以外無有推而廣之者唐宋以來始
有書院之設然亦廢興無時或不能如夏殷成
周之盛矣今遇

聖天子崇儒重道文教聿興海內喁喁向風凡扶桑
日出之國咸願遣子入侍觀聽圓橋是誠以治
統而兼道統由虞唐三代以後未有如

今日之至隆極盛者也猗歟休哉余以謏材恭膺
簡命節制全楚於撫輯兵農興除利弊之餘恒願化
民成俗宣揚

聖意故凡學宮之未及修葺條教之未及詳明者鼓
舞倡導之不遺餘力唯日孜孜虞其未逮幸而
帝德光被瀟湘江漢之間咸敦詩書禮樂之訓而長

沙趙郡丞所輯嶽麓書院誌適於是乎告成請
序於余余按嶽麓爲扶輿磅礴之氣綿亘數百
里上應朱鳥下據南離靈奇秘怪窟穴其間書
院之創則始於宋郡守朱洞至南軒晦庵諸先
生設臬比橫經於此生徒日數千人遂與嵩陽
白鹿並傳我

皇上頒賜

御書匾額經講義于其內大道昭揭如日月之經
天江河之行地諸生匡坐鼓篋朝絃而夕誦之

於以闡洙泗之微言發濂洛之奧義甚盛典也
乃趙丞復能捃拾殘編蒐羅放失踵修前志粹
美增華彙爲一書其亦可以上佐蘭臺石室之
藏下補輿圖傳記之缺厥功茂矣士之披覽是
書者應不徒攷其山川靈異與夫名物器數而
欣欣然講肄誦習率循朱張二夫子之教訓以
仰承

聖朝菁莪棫樸之化其亦庶乎無負余平日之鼓舞
倡導而相得爲益彰也余因舉其說以識諸簡

端而更爲多士勉之

肯

康熙二十六年歲次丁卯二月穀旦

總督湖廣等處地方文武事務兼理糧餉兵部尙
書兼都察院右副都御史徐國相題

序

余秉節南楚經年之後倡諸同志修葺嶽麓書院規模既具條教漸陳始循故事疏請院額經籍於

朝因通志載朱張講學之事未詳議令查覆於是備考新舊志書宋史及諸家文集所紀述再疏申請蒙我

皇上俞允

特命中翰恭齋

御書賜額暨經史講義諸書懸於其中

宸翰爛若雲霞講義明如星日眞足以昭垂萬世而
長沙趙郡丞所修嶽麓誌適於是時告成凡疆
域沿革理學源流以及幽靈秘蹟雖微必錄比
舊加詳蓋嶽麓之有誌自有明正德時學使陳
君鳳梧始崇正時吳生道行踵修之兵火洊經
已爲煨燼四十年來無有計及此者趙郡丞因
慨然掇拾殘編搜羅放佚增華趾美彙爲成書
良亦勤矣或者謂衡山爲五嶽之一嶽麓又爲

衡山七十二峯之一以天下之大觀之宜若培
塿然況近奉

詔令郡國志乘輿圖雖山陬僻壤罔有或遺金匱石
室之藏豈復需此作者之用心不亦過乎余曰
不然通誌合一省之郡邑故多而不及備府誌
列十二州縣之名物亦畧而不獲詳卽衡嶽一
誌以節取七十二峯之勝概則汎而不能專且
嶽麓之重繫於書院皆諸儒明道繼統之地非
直登臨游覽之資也試俯仰以觀古今之際自

屈子賈生忠憤無聊發爲騷賦後之流連憑弔
世不乏人然猶託之詠歌藻麗以寄孤臣遷客
之思至宋而朱公創建書院振起儒風則有濂
溪先生出於道州首明聖賢性命之學繼往開
來自是道統相傳龜山文定南軒晦菴諸先生
皆於此地講學設教造就生徒學者之盛至此
瀟湘於洙泗豈一郡邑一山水所可擬議而衡
量者哉其規條整飭訓誡詳明至今讀之歷歷
可爲士子法凡諸生之登斯堂者按此志以尋

則先儒之流風舊韻若或相遇於江山絃誦之
間卽遐方髦士心雖嚮往未能身至於斯得此
冊以觀恍然周旋揖讓於茲堂之內而得先儒
精神志氣之所在亦足以陶淑性情深求自趣
豈僅如少女所謂撫琴動操眾山皆響以博卧
游之樂而已耶則此志之不可少而作者之意
固有在也至若山川葦樹所以拱游衍而資多
識固學者所不廢其他奇蹤幻說雖無關於儒
術然故籍有之存而不沒亦以見茲舉之大云

余慮觀斯志者有疑於政者之說而泯集輯之
勤故撮其大指而序之如此 皆

康熙二十六年歲次丁卯四月中濟穀旦

賜進士出身巡撫偏沅等處地方提督軍務兼理糧
餉都察院右副都御史丁思孔題

敘

嶽麓之有書院舊矣自我

皇上褒崇先賢表章理學

御書匾額有賜日講解義及十三經世一史發蘭臺
石室之藏則山若增而高水若濬而深亭臺草
樹若卿雲湧而澍雨注也湖南距

京師六千餘里

聖化光被多士雲蒸橫經鼓篋駸駸乎鄒魯之風焉
西漢元朔東京永平之盛茂以加矣其人臣事

聖天子出膺民社之寄則以承流宣化誕敷文教爲
先務若長沙郡丞趙君管亭之志嶽麓度幾哉
知所先務矣余覽之歎其敘次山川鋪陳古蹟
闡明道統擣捭執文彬彬乎蔚蔚乎大觀哉漢
史稱董仲舒公孫弘兒寬居官可紀三人皆儒
者通於世務以經術潤飾吏事天子器之蓋經
術者經世之權輿也士大夫沈酣六籍羹牆孔
孟則所至皆有聲績表見於當世何則被服爾
雅訓辭深厚離俗而近於古也觀嶽麓之志則

趙君之經術可覩矣志發凡起例不忘創始之
勞而新典首紀褫皇炳煥可以昭垂萬禩南軒
考亭之所講習者將日新而富有其功於人心
世教豈淺也哉夫志岱宗者昭山靈孕毓之奇
志閩里者溯人文化成之本衡嶽七十二峯蜿
蟠磅礴至麓而渟涵無盡厥鍾璫矣書院之所
蘊結日星粲而瀟湘流於尼山杏壇爲耳孫焉
是志之美殆非斐斐之說所能掄揚也夫

賜進士傳臚翰林院檢討奉

自纂修日講禮經解義明史

大清一統志

欽命貴州典試正考官前本院庶吉士楚黃金德嘉
拜謨

嶽麓書院志序

天下有四大書院而嶽麓居其一北繞洞庭南
連衡嶽巋然名秀之區也自南軒晦庵兩先賢
講道於斯四方學者接踵而至遂名聞天下歷
元明來代有遷流而書院迄今不廢豈山川之
靈歟抑志書所傳使後之誦讀者鑑古可以知
今瞻前足以勵後也兵燹之餘幾湮蔓草

大中丞丁公整躬率屬惓惓以鼓舞人才爲先務
爰葺講堂規模弘敞聿興文教多士景從殷然